

10. Korrika. Korrikako misterioak

1980an 1. edizioa ospatu zenez geroztik, milaka istorio pasatu dira, ikusi duzuen bezala. 17 urte igaro dira eta, azkenean, iritsi gara bi zifretara! Korrikaren 10. edizioa 1997ko martxoaren 14an hasi zen Arantzazuko santutegian, eta, 2.150 km egin ostean, martxoaren 23an amaitu zen Bilbon, "Euskal Herria Korrika" lelopean. Joan Mari Torrealda azaldu zen azken kilometroan, bera izan baitzen mezuaren egilea. Omendua, aldiz, Luis Villasante frantziskotar, euskal hizkuntzalari eta euskaltzaina izan zen. Bestalde, Gozategi taldeko anai-arrebek alaitu zituzten errepideetako kilometroak, Andoni Egañaren hitzak musikaturik.

10. edizioa misterioz beteta egon zen. CSIkoek bezala, ikerketa sakona egin eta gero, batzuen erantzun bete-betea bilatu dut; beste batzuek, berriz, sekretu izaten jarraitu beharko dute.

1. misterioa. Ibilbide klonatua

Lehen esan dudan moduan, lehenengo edizioa Oñatitik Bilbora joan zen; hamargarrena, ostera, Arantzazutik Bilbora. Kontuan izanda Arantzazu Oñatin dagoela, zergatik errepikatu zen bidea? Gainontzeko edizioetan, hori ez da inoiz ere gertatu. AEKren liburutegian, txostenen artean, dokumentalen artean bilatu nuen azalpena, eta Korrika arduradunei galdetzen ere aritu nintzen. Azkenean, erantzuna topatu nuen.

Korrika 10ek 1. Korrikarekin antza edukitzea apropos egin zuten (bai, bai, entzuten ari zaretena: A PRO-POS!). 17 urte haietan egindako lana omendu nahi zuten, nolabait, eta pentsatu zuten ibilbidea "berriro egitea" ideia paregabea izan zitekeela. Hala ere, aipatu beharra dago urteetako lanak fruiturik eman zuela; izan ere, Korrika 1ek 1.820 km izan zituen, eta Korrika 10ek 2.150.

2. misterioa. Andoni Egaña X espedientean

"Euskal Herria Korrika" kantaren lelo edo errepika ("estribilloa") honela hasten da: (...). Horra hor beste misterio bat: zergatik baztertu zuten 7 zenbakia? Berriz ere, AEKren liburutegira jo nuen, txostenak arakatu, eta dokumentalen artean bilatu nuen, baina ezer gutxi aurkitu nuen. Hortaz, Andoni Egaña handiari galdera hau egin nahi diot: ezkutuan uzteko garaia badator, zazpigarrena ere izan zen jator... beraz, zergatik da "sator"? Oraingo, zalantzan murgildurik segitu beharko dugu...

Sona handiko bertsolariak, sekretu batekin nahikoa ez, eta bigarren bat ere utzi zigun: ez dakit ohartuak egongo zineten, baina leloan zehar hizki edo letra batzuk solte azaltzen dira. Ez didazue sinesten? Entzun dezagun, bada.

Jolas bat egingo dugu: zuek papera eta arkatza hartu, eta nik leloaren pusketa jarriko dizuet. Hizki solte horietakoren bat topatzen badugu, abestia gelditu egingo dut eta zuek hizkia idatziko duzue, ados? Ea zer gertatzen den. Prestatzeko denbora pixka bat utziko dizuet (...). Prest al zaudete? Goazen, bada!

(...) "K" bi hanka luzerekin korrika hasi da. Bale, lehenengo hizkia, K. Jarrai dezagun kantuarekin. (...) hemen "O" da, argiago entzuten da... (...) "R", aurrera (...) bale, bigarren "R" a. (...) "I" hizkia, auskalo zein "hitz" osatuko dugun... (...) Oraingoan "K" (...) eta, azkenik, "A". Zein hitz osatu duzue? Hori da! Andoni Egañak mezu sekretu bat utzi zigun, eta hitz misterioitsu hori, nola ez, "KORRIKA" da.

Gaurkoz ez naiz gehiago luzatuko; 10. edizioan nahiko misterio izan ditugu. Hurrengo atalean, Korrika 11ra iritsiko gara. Edizio horretan ere beste enigma bat edukiko dugu; Korrika ezkutuko kontuez beteta dago, antza. Misterio horrek 11 zenbakiarekin dauka zerikusia, baina xehetasun gehiago hurrengo atalean emango dizkizuet; bien bitartean, txintxoak izan! Agur, eta ondo izan!